

Minister Benny Sevinger

Renobacion di Madiki ta un master plan di varios fase

ORANJESTAD – Durante e inspeccion cu Minister Benny Sevinger a haci di-aluna ultimo na Madiki, el a splica con e renobacion di henter e bario ta un master plan cu a keda parti den varios fase y ta cubri un area amplio beneficiando gran parti di e poblacion den districto di Oranjestad. “E plannan di e proyecto aki ta grandi,” Minister Sevinger a bisa.

CAMBIO

E trabounan di reconstrucion completo y renobacion di e infraestructura den Timonstraat, Balandersstraat y Schoenerstraat ta hopi avansa na e punto cu su habitantenan ya ta mira y sinti un cambio. Sra. Irena Tromp Hoek, habitante di e area a bisa cu “diado-



Algun habitante revisando e mapa hunto cu Prome Minister Mike Eman y Minister di Infraestructura, Sr. Benny Sevinger.

mingo tur e muchanan ta core, mi ta para na cura y mi ta wak nan.” Minister Sevinger a sigura cu den un luna e cayanan lo ta completamente cla, na tempo pa e bario por celebra e fiestanan di fin di aña.

LO SIGUI DEN JANUARI

Y ta hustamente pa duna un pausa na e molester di construccion, stof y mashinnan riba caminda, Minister Sevinger a splica cu ta para e trabounan den ultimo simannan di December, pa reinicia na januari y caba cu e resto di cayanan den e fase aki. Ta trata di, entre otro Corvettestraat y Canostraat, cu ta keda cla pa nos mas tarda cu luna di maart.

UN SOLO DIRECCION

E mandatario a indica cu ademas di e cayanan chikito, cu por cierto awor ta bira ‘eenrichtingsweg’ of caminda di un solo direccion cu e proposito di duna mas seguridad den e bario, e camindanan principal den Madiki tambe lo conoce mehoracion.

“Den januari pa februari tambe ta cuminsa dreacha loka ta Driemasterstraat, Weststraat y Belgiastraat.

Ta sigui despues cu otro fasenan den e masterplan. Por ehempel, Madiki Fase 2 ta cubri e area banda di Anglo Kleuterschool bay ariba; Bushiri ta inicia na luna di februari y lo embeyece e bicindario di cas di pueblo nobo, bay ariba tambe.

PASENSHI

Minister di Infraestructura a splica cu “Tur e proyectonan ta conecta cu e trabounan den Rancho, Caya Grandi y Oranjestad” Ta inclui e renobacion di edificio bieu di belasting den

Paardenbaaistraat. “Dia 10 di e luna aki ta haya sa cua ta e contratista cu lo haya e proyecto di renobacion y e proyecto su proceso ta sigui cana.”

Minister Sevinger a sigura na tur esnan presente cu e ta bek den bario aki un luna pa wak si e contratista a cumpli y wak kico mas ta haci falta den e bario.

Tambe e titular di Infraestructura y Medio Ambiente a gradici e habitantenan pa e confianza y comprension cu a duna e trabounan cu Gabinete Mike Eman ta haciendo pa pueblo. “Danki na e bario pa e pasenshi pa a wanta e stof y tur otro molester, pero na final nos lo tin un bario masha bunita,” Minister a bisa. □